

«Noss hoteliers fan fitg buna lavur»

Hotelleriesuisse Grischun: Radunanza generala

DA GION NUTEGN STGIER / FMR

■ **La qualitat dals hotels en il Grischun, quella saja s'augmentada fitg ils davos dus onns. Ils pretschs per pernottar en l'Austria sajan er vegnids pli auts e quai saja la raschun ch'ils Svizzers fetschian puspè vacanzas en l'agen pajais. Star be paucs dis en il hotel, quai saja oz il grond trend.** Tut quai ha ditg *Ernst Wyrsh*, el ch'è dapi il 2013 president da Hotelleriesuisse Grischun, l'associaziun che reunescha ils passa 500 hoteliers grischuns. Oz salva quella federaziun chantunala sia radunanza generala a San Murezzan. En vista a quella ha la FMR discurrei cun il pli aut hotelier dal Grischun.

Giasts cuntents

Quai che pertutga il maletg (image) da la gastronomia e da la hotellaria manegia Wyrsh: «Il sbagl è che nus cartain a quel problem. La gronda part dals ustiers e hoteliers fa mintga di fitg buna lavur.» Areguard la qualitat dals hotels grischuns dastga el dir, e quai cun buna raschun, che quella saja fitg auta, per in pau pli auta ch'è en l'Austria ed er en il Tirol dal sid. Oz sajan er ils pretschs per pernottar en in hotel da quellas duas regiuns per in pau pli auts, bunamain uschè auts sco en il Grischun. La qualitat, quella saja persuerter pli bassa ed er la prestaziun da servetsch. Gist il giast svizzer haja realisà quai e restia oz puspè en Svizra per ir cun skis e per far vacanzas. Quai conferma l'augment permanent da las pernottaziuns er en il Grischun ed en general en Svizra. Wyrsh manegia ch'è en general sajan ils giasts fitg cuntents cun la purschi-

da, cun ils pretschs, cun il servis e cun l'ospitalità dals hoteliers grischuns. Events gronds sco cursas da skis da la Cuppa mundiala, il Tour de Ski, cursas da bike, occurrenz culturalas e festivals da musica, da tut quellas occurrenz profitecha la hotellaria, menziuna Wyrsh. Quellas occurrenz portan blers novs e cunzunt er auters giasts. Blers da quels giasts turnan lura puspè cun la famiglia ubain cun amis ed enconuschents.

Cun distanza las pli autas pajas

Remartgabel saja ch'els hoteliers grischuns sajan abels da tegnair la qualitat en lur chasas er cun mancar persunas qualifitgadas. La mancanza da persunas dal rom saja il pli grond problem en la hotellaria e la gastronomia, punctuescha Wyrsh. En l'Europa hajan ils emploiads dals hotels e dals restaurants svizzers cun distanza las pli autas pajas. A la hotellaria ed a la gastronomia mancan cunzunt cuschiniers, cameriers e recepziunistas.

Il president dals hoteliers grischuns manegia ch'è en la hotellaria e la gastronomia sajan avant maun bleras persunas qualifitgadas. Quellas sajan fitg tschertgadas tar autras bransch sco dal comerzi en detagl, bancas, gronds concerns e firmas da virtualias.

Cunzunt il personal da cader dals hotels, quel saja dumandà tar autras bransch cun er esser il personal flexibel e supporta bler squitsch. 70% dals absolvents da la Scola da hotel internaziunala a Losanna midan suenter dus onns lavur en in hotel en in'otra bran-



Ernst Wyrsh, dapi set onns president dals hoteliers grischuns.

FOTO G. N. STGIER

scha, ha ditg il pli aut hotelier dal Grischun.

Trais dis èn gia ina buna media

L'hotelier da Tavau lauda ses collegas. Els hajan gi il curaschi dad auzar ils pretschs, quai che saja er necessari per star sur l'aua. La Svizra na saja nagin pajais cun in dumping da pretschs, ha punctuà Wyrsh. A medem mument hajan ils hoteliers dà dapli paisa a la qualitat ed er fatg pulitas investiziuns, quai che vegnia stimà fitg dals giasts. Oz restan quels en media trais notgs en in hotel ed avant 20 onns eran quai bunamain duas emnas, raquinta Wyrsh. Il trend saja oz d'ir quatter giadas trais dis en in lieu e quai adina en in'otra destinaziun, schizunt en l'exteriur. Per ils hotels munta quai

ch'els dovran quatter giadas dapli giasts per vegnir sin il dumber necessari tar las pernottaziuns e tar ils giasts. Las midadas permanentas chaschunan lura er dapli custs da personal e da manschi.

Investurs da l'exteriur

In fatg positiv saja che cunzunt investurs da l'exteriur hajan fidanza en la hotellaria svizra, manegia Wyrsh. Els sajan er pronts d'investir bellas summas per novs hotels, quai che saja zunt plaschaivel. In exempel saja ch'è il hotel Grava a Savognin vegnia finanzià d'in investur dal Principadi da Liechtenstein. Er auters projects sajan vegnids finanziads da persunas da l'exteriur ed intgins vegnan a suandar, ha ditg Wyrsh.